

Txirritola

ARAMAIO / Barikua / 2005eko irailaren 16a / 163. zenbakia

KOORDINATZAILEA: Ubane Madera • Otorla Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Guztia gertu dute Aitor Aranaren omenezko IX. ibilaldirako

U.M.

Datorren zapatuan egingo dute aurtengo edizioa. Sei-zazpi orduko ibilbidea prestatu du Orixol Mendi Elkarteak, baina azpimarratu nahi dute parte-hartzaileek edozein momentutan utz dezaketela ibilbidea; hau da, ez dutela zertan ibilbide osoa egin.

Izan ere, askorendako gogorra da sei-zazpi orduan ibitzea; hala, zirkuitua edozein momentutan uzteko aukera egongo dela ziurtatu digu Orixol Mendi Elkarteak, eta, modu horretan, edozeinek parte hartu ahal izango duela Aitor Aranaren omenezko ibilaldian. Hala, antolatzaileek jende dezentente espero dute; izan ere, iaz 150 bat lagun izan ziren. Gainera, jakinarazi digute dagoeneko bidali dutela gonbidapena Euskal Herriko mendi-elkarte guztietara.

IBILBIDEA NONDIK NORA ETA NOIZ

Orixol Mendi Elkarteak presidente Aitziber Aginagaldek esan digu zein den aurtengo ibilbidea: Ibarra, Tellamendi, Izpizte, Zabalaundi, Olaeta, Marixeka, Orixol eta Ibarra.

08:00etan aterako dira Ibarrik. Izenematea, berriz, apur-



Iaz, 150 bat parte-hartzaile etorri ziren Aramaioa, Aitor Aranaren ibilaldira.

txo bat lehenago egin beharko dute, leku berean. Bestalde, hiru hornidura-zona izango dituzte bidean: "Handiena Marixekan; han salda eta txorizoa emango dizkiegu parte-hartzaileei".

OROIGARRIA GUZTIENDAKO

Horrez guztiaz gainera, kiroldegiko dutxak erabili ahal izango

dituzte parte-hartzaileek mendi-buelta bukatzen dutenean. Eta guztiendako oroigarritxo eta diploma bana prestatu ditu Orixol Mendi Elkarteak; baita ibilbidea bukatzen ez dutenendako ere.

Informazio gehiago behar duenak, honako telefonora dei dezake: 945 44 51 05 (Aitziber).

Datorren astean hasiko da ehiza denboraldia

U.M.

Irailaren 25ean hasi eta otsailaren bigarren domekara arte ibiliko dira Aramaion ehizan. Basurdea ehizatze sasoia da Araban. Eta izango dute zer ehizatu, urtetik urtera handitu egiten da eta Arabako —eta Aramaio— basurde kopurua.

Eta horrekin batera, igo egin da baita ere urtetik urtera baserritarrek soroetan eta zelaietan izaten dituzten kalteak, basurdeek eraginda. Oiligor Ehiza eta Arrantza elkarteak presidente Eduardo Fernandezek jakinarazi digunez, aurtengo dagoeneko eragin dituzte zenbait kalte Azkoagan. Artoa eta babak zeuden sororen batean sartu dira. Halakoetan ohi duten moduan, Oiligor elkarteak kalte-ordainak emango dizkio kaltetutako baserritarrei. Gainera, laster lasaiago ibili ahal izango dira baserritarrak, laster hasiko dira eta Aramaion uxaldiak egiten.

BI KOADRILA IBILIKO DIRA EHIZAN

Hain justu ere, lehen esandako moduan, ehiza denboraldia datorren domekan hasiko dute eta egunean bertan egingo dute Aramaion lehenengo uxaldia. 15 bat lagun aterako direla kontatu digute. Eta

hamabost egun barru beste uxaldi bat egingo dutela. Izan ere, Aramaion bi koadrila ibiltzen dira ehiza larrian. Eta txandaka ateratzen dira uxaldiak egitera. Koadrila horietako bateko kide Asier Elexalde kontatu digunez, urtean uxaldi kopuru jakinak egiteko baimena ematen die Diputazioak, tokian tokiko ehiza aukeren arabera. Hala, Aramaion 18 uxaldi egiteko baimena dute eta koadrila bakoitzak bederatzina egingo ditu.

Irailaren 25ean egingo dute lehen uxaldia; 15 bat lagun aterako dira basurde bila

Basurdeek dagoeneko eragin dituzte kalteak Azkoagako soro batean

San Martin Eskolan ekin diote ikasturte berriari

U.M.

Joan den egunean, hilak 8, estreinatu zuten San Martin Eskolan aurtengo ikasturtea. Orain, goizez bakarrik dabilta neska-mutikoak. Astelehenetik aurrera hasiko dira goizez eta arratsaldez. Bi urtekoak ere datorren astean hasiko dira. Bestelakoen artean, bizikidetzako landuko dute aurtengo.

125 neska-mutiko matrikulatu dira aurtengo San Martin Eskolan, 55 neska eta 70 mutiko. Horien artean, hiru ikasle berri badira, Aramaioa bizitzera etorri direnak. Bi

urtekoei dagokienez, berriz, aurtengo 12 matrikulatu dira eta datorren astean hasiko dira eskolan, adaptazioa egiten. Eta irakasleei dagokienez, 16 dira, berriak bost.

ZUZENDARI BERRIA

Bestalde, Blanka Mendialdua aukeratu dute aurtengo ikasturterako zuzendari. Hark adierazi digunez, aurtengo landuko duten proiektua bizikidetzako (elkarrekin bizitzea) da. Horrekin batera, IKT programan ere sakonduko dute: Informatikaren eta Komunikazioaren Teknologia. Oro har, ordenagailuen erabilpena ikasleei erakustea da IKT.



Pozik ibiltzen dira umeak eskolan, batez ere txikiak eta batez ere jolas-orduan.

LABUR

Erretiratuen Egunerako izenematea zabalik

Dagoeneko egin dute Erretiratuen Egunean parte hartze-ko deia. Antolatzaileak, Arabako Pentsiodunen, Erretiratuen eta Alargunen Elkarte Probintzialak, urriaren 8a aukeratu du horretarako. Eta 13:00etan ipini dute hitzordua. Babesgabeen Parrokian meza esango dute eta. Horren ostean, 14:30ean bazkaria eta dantzaldia izango dituzte, Mendi-zorrotza kiroldegian. Parte hartu nahi duenak irailaren 28a baino lehen 20 euro sartu beharko ditu Vital Kutxan.

ELKARRIZKETA

FERMIN ETXEBARRIA/ARTZAINA

“Lehen txakurrik ez genuen; erabiltzen genituen piper-poteak, harriz beteta”

UBANE MADERA

Domekan, Artzain Eguna ospatuko dute Amurrion (11:00). Beste batzuekin batera, gonbidatu berezia izango dute han: Arraga auzoko Fermin Etxebarria artzaina. Bizipentxo batzuk kontatu dizkiugu jaiotetxean, Arraga-burun:

Pozik hartuko duzu omenaldia?
Bai. (Barre) Bueno, pozik edo behintzat atera zitekeenik ez nuen pentsatu.

Zenbat urtean ibili zara artzain?
Bizi guztian. Beste lan batzuk ere egin ditut: mendian ibili arbolak botatzén... Dirua falta zen eta nonbaitetik atera egin behar! Anaiak eta nituen gazteagoak, eta artzain haiek ibili ziren; baina fabrikara sartu ziren, aita osasun arazoekin hasi zen eta neu hasi nintzen artzain eta etxeko ganaduak zaintzen.

Beraz, lan asko egindakoa zara...
Bai, nahikoa, pobrea izateko... (Barre) Baina orduan ardi asko nituen eta orain gutxitxoago. Orduan 260-edo nituen.

Non ibiltzen zinen ardiekin?
Hemen, Etxaguengo haitzean. Eta orain, ostera, Anboton. Anboton, e?

Bai. Han dugu elkarte bat eta ardien buelta egin ostean, hamarretakoa egiten dugu. Kazatxo izena du.
Zergatik aldatu zenuen lekua?
Haitzean asko jausi egiten ziren eta norberarendako ere arriskua zegoen. Anboton, berriz, mendiak arrisku txikiagoa du eta garbiagoa da. Hemen asko kostatzen zen, baita ere, ardiak pilatzea; han samurtxoagoa da.
Orain zenbat ardi dituzu, bada?
80 bat.



U.M.

“8-9 urterekin joan nintzen lehenengo aldiz mendira, aitarekin, 150 bat ardirekin”

A! Ez dira gutxi!
(Barre)
Eta egunero ibiltzen zara?
Orain baserrian lan gutxiago dago eta egunero ibiltzen naiz. Lauzpabost elkartzen gara han, tertulian egin, hamarretakoa egin... Horrela ibiltzen gara.

“Timoti Etxebarria da Aramaioko artzainik gogorrena. Euskal Herrian ez da egongo halakorik!”

Zela izaten da?
Neu jaikitzen naiz 07:00etan eta 07:30ean-edo ateratzen naiz, autoz, bertaraino. Hemendik ardiak dauden lekura 15 bat minutu dago autoz joanda.
Gero neguan?
Hona berriro, etxerantz.

Eta txakurrak?
Bat gánorazkoa: *Soli*.
Ikusten dudanez, zu oraindik ez zara erretiratu?
Ez, gainera jarraitzeko asmoa dut. Erretiraturuz gero... Niri kalea ez zait gustatzen; bueno, koadrilan eta gustatzen zait, baina eguneroko txikiteoa eta ez. Nik gura dut apur bat entretenitu. 15 behor ere baditut.
Ardiak, behorrak... Gehiago?
Ganadua ere banuen; iaz kendu nuen.

Zu bakarrik guztiarekin?
Anaiak ere laguntzen dit. Hura erretiratu egin da fabrikatik...
Hara! Hura erretiratu, eta zu ez?
Diru gutxi pagatzen didate; hala ezin. Gainera, esnea gutxi pagatzen dute, pentsuak eta garestitu... Ahal den artean ardiak izango ditut, eta kito.

Akordatzen zara mendira joan zinen lehenengo egun harekin?
Bai, 8-9 urterekin, aitarekin. Etxaguengo haitzera joan ginen, 150 bat ardirekin. Orduan txakurrik ez zegoen. Erabiltzen genituen piper-poteak, kontserbakoak. Harriekin bete, *ra-ra-ra* eragin, eta ardiei horrela eragiten genien arineketan, txakurrik bat ere barik. Lehenengo txakurra 20 urte egin nituenean-edo ipini genuen. Orain askoz samurragoa da. Ardiak urrun izan arren, txakurra bidaltzen duzu, eta, hezita badago, hark ekartzen ditu ondora; autoz goaz...
Luxu asko, ezta?

Larregi. Oinez ibiltzeko orain nagikeria-edo... Samurrera ohitu egiten gara.
Eta Aramaion, gaur egun zenbat geratzen zarete artzain?
Asko dago; hori bai, artzain txiki samarrak dira.

TELEFONOJAKINGARRIAK

OSASUNA / LARRIALDIAK

| | |
|---------------------------|--------------|
| Osasun etxea (txandak) | 945 44 53 40 |
| Botika | 945 44 50 03 |
| Udaletekoa | 945 44 50 16 |
| Ertzaintza (Arrasate) | 943 79 71 99 |
| Gurutze Gorria (Legutio) | 945 45 52 52 |
| San Martin Eskola | 945 44 50 04 |
| Taxia eta autobusak | 945 44 50 33 |
| Udal Kiroldegia | 945 44 53 35 |
| Postetxea | 945 44 50 83 |
| Zubiako Eskualdea | 945 43 01 67 |
| Suhiltzaileak (Zubillaga) | 943 78 28 00 |

AUTOBUSORDUTEGIA

| ARRASATE | ARAMAIO | GASTEIZ |
|----------|---------|---------|
| 07:00 | 07:15 | 08:00 |
| 10:00* | 10:15 | |
| 11:00 | 11:15 | |
| 12:00* | 12:15* | 13:00 |
| 15:15 | 15:30 | 16:15 |
| 17:20 | 17:35 | |
| 18:30* | 18:45 | |
| 20:30 | 20:45 | 21:25 |
| 21:00* | 21:15 | |

| GASTEIZ | ARAMAIO | ARRASATE |
|---------|---------|----------|
| | 07:50 | 08:05 |
| 08:15 | 09:00 | 09:15 |
| | 10:15* | 10:30 |
| | 11:15 | 11:30 |
| 13:10 | 13:55 | 14:10 |
| 16:20 | 17:05 | 17:20 |
| | 17:35 | 17:50 |
| | 18:45* | 19:00 |
| 19:30 | 20:00 | 20:15 |

OHARRA: izartxoan duten orduetan eskaeraren azaberako zerbitzua eskaintzen dute. Auzotako bizilagunei zuzendutakoa da, eta autobusa erabili gura badute, bezperan deitu beharko dute honako zenbaki honetara: 629 54 59 23

OHARRAK

GRIPEAREN KONTRAKO TXERTOA
Irailaren 19tik azaroaren 4ra arte jardungo dute aurten gripearen kontrako txertoa ipintzen. 65 urtetik gorako guztiek eta gaixotasun kronikoren bat dutenek (bihotzekoak, biriketakoak, giltzurrunekoak...) hartu behar dute txertoa. Eta nahi izanez gero, pertsona nagusiekin eta harremanak dituztenek ere har dezakete; gizarte laguntzaileek, esaterako. Oro har, medikuek txerto hori ipintzea gomendatzen dute, gripearen eragina dezente saihesten du eta. Aramaiorako 250 txerto prestatu ditu Osakidetza, baina, beharra izanez gero, gehiago eska ditzakete. Gripearen kontrako txertoa hartzeko derrigorrezkoa da aldeztu aurretik txanda hartzea. Horretarako honako telefonoren batera deitu beharra dago: 945 44 53 40 edo 943 03 52 50. Txertoa Aramaioko anbulatorioan emango dute. Anbulatorioa joan ezin dutenei, berriz, erizaina joango zaie etxera, hala eskatuz gero. Orduetgia honako hauze da: asteleheneetik barikura, 08:00etatik 13:30era; eta martitzenetan, 15:00ak arte.

Arabako gotzaina, kofradiako bazkarian

U.M.

Aramaioko abadeek eta Aramaion abade ibilitakoez ohitura dute urtean behin Aramaion elkartu eta bazkaria egiteko. Andramari Egunez hurrengo martitzenean egin ohi dute hori. Aurten ere hala izan da. Gainera, gonbidatu berezia izan dute: Arabako gotzain Mikel Asurmendi.

Andra Mari Ibabe kofradiako abadeak elkartzen dira urtean behin Aramaion. Emilio Perez parro-

koak kontatu digunez “XVI. mendea ezkerer uteror-uteror egin izan dugu”. Aurten, honako hauek elkartu dira: Jesus Mari Elexalde (aramaiorarra), Prudentzio Garai, Ramon Larrañaga (Oletan abade da orain), Benito Nafarrate (aramaiorarra), Jose Mari Salazar, Jabi Zubiaurre, Antonio Untzeta (aramaiorarra), Angel Ibisate (Arabako elizbarrutiko liburuzaina), Emilio Perez (Aramaioko gaur egungo parrokoa) eta Mikel Asurmendi (gotzaina).

Erretiratuenean egin dute bazkaria, eta bapoz jan ere.



U.M.

Kofradiako abadeak, erretiratuaren egoitzan, bazkaldu ostean.